



Gabinete Wever - Croes II

ISLAONLINE

Noticia di Gobierno

2023

Diabierna 12 Mei 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



E CONFERENCIA "CARIBBEAN CLIMATE ENERGY CONFERENCE 2023", TABATA UN EXITO

"Den nomber di Gobierno di Aruba, y como pais anfitrión di e conferencia aki, mi kier gradici tur e participantenan pa tuma nan tempo pa bin atende e conferencia importante aki"



y Pacifico pa nan presencia.

Prome Minister a indica cu durante e último dianan tabata tin varios discucionnan riba e impacto di cambio di clima riba e paisnan chikito. Tambe a papia di e diferente maneranan cu lo por maneha e cambio di clima y con pa busca solucionnan den miho interes di e comunidad y nacionnan.

Manera ta conoci, transicion energetico ta un necesidad pa por reduci e dependencia riba "fossil fuel", teniendo na cuenta kico e transicion aki ta nifica pa e comunidad, e recibonan di coriente y e mercado laboral. No solamente mester pone atencion riba energia sostenibel sino tambe riba energia pagabel dirigiendo tur programa di energia renobabel na no solamente baha, sino estabilisa e prijs di energia, Prome Minister a splica,

Tambe, Prome Minister a splica cu Aruba como pais chikito ta sumamente vulnerabel na e menasan di cambio di clima. Pesey ta importante pa mehora e infraestructura y/of pa busca solucionnan basa riba naturalesa. Pa por accelera e proceso di transicion energetico y construi resiliencia climatico lo mester di sumanan grandi pa inverti, pero por a nota durante e conferencia aki y otro foronan, cu tin bareranan pa loke ta trata financiamiento climatico global, specialmente pa e islanan chikito.

Diabierna mainta a tuma luga e último presentacionnan pa loke ta e Caribbean Climate Energy Conference 2023 (CCEC2023). Na final di e conferencia, den un conferencia di prensa en conjunto cu Minister Rob Jetten, Prome Minister Evelyn Wever-Croes a duna su discurso final gradiciendo tur e paisnan y institucionnan den Caribe, America Central, Europa

Pa conclui, Prome Minister a indica cu colaboracion riba nivel regional, pa loke ta cambio di clima ta esencial. Ta importante pa colabora y intercambia practicanan cu lo ta exitoso, y pa uni forza y construi un aliansa regional pa asina nos bos wordo scucha riba nivel global.

Continuacion **CARIBBEAN CLIMATE ENERGY CONFERENCE 2023....**



"Den nomber di Gobierno di Aruba y como pais anfitrión di e conferencia aki, mi kier gradici tur e participantenan pa tuma nan tempo pa bin atende e conferencia importante aki. Mi ta spera cu boso estadia aki tabata uno placentero y di pronto por mira cada un di boso bek akinan. Mi ta gradici e Gobierno di Hulanda pa tur e cooperacion pa cu organisacion di e conferencia aki. Tambe un danki special na Minister di Energia y Clima di Hulanda, señor Rob Jetten cu tabata e "co-host" di e conferencia. Bo entusiasmo y boluntad pa apoya e islanan chikito ta di aprecia. Di awor caba mi ta entusiasma pa e siguiente CCEC2023 sperando di mira progreso real riba tur loke a wordo discuti durante e conferencia," Prome Minister a expresa.





SRA. ZULEMA ERASMUS POSTULA COMO E SIGUIENTE MINISTER PLENIPOTENCIARIO NA WASHINGTON



Minister Ursell Arends, ta informa cu sra. Zulema Erasmus, a ser postula como e siguiente Minister Plenipotenciario na Washington.

Zulema ta traha pa Gobierno di Aruba desde 2005. Actualmente e ta eherce e funcion di Afdelingshoofd na Departamento di Asuntonan Economico, Comercio y Industria di cual e tin un team encarga cu Business Support, Export Promotion, Investment Promotion y Trade Policy. E tin e funcion tambe di Directora Interino di e Departamento.

Zulema a gradua na Rijksuniversiteit Groningen den International Relations/International Organizations despues di a caba VWO na Colegio Arubano. Un stage na Ministerio di Asuntonan Exterior cerca e Adviseur Koninkrijkszaken a

duna Zulema e conviccion cu e miho manera pa aporta na bienestar y progreso di su dushi isla, ta pa traha na Aruba mes.

Semper e tabata di opinion cu aunke Relacionnan Exterior ta un tema di Reino, cu Aruba por ta un pionero riba nivel internacional y por influencia e agenda internacional. Zulema ta mira cu Aruba tin hopi candidatonan cu por funciona exitosamente den diplomacia den Reino Hulandes, pero e oportunidadnan ta limita pasobra mester competi cu Hulandesnan pa un funcion diplomatico na Ministerio di Asuntonan Exterior.

Den su carera como ambtenaar, Zulema a eherce e funcion di beleidsmedewerker na Departamento di Asuntonan Economico, Comercio y Industria, como na Departamento di Asuntonan Exterior. Su experticio den gobierno a amplia ora Zulema a traha na Bestuurskantoor prome como Adviseur di Minister y despues como Waarnemend Secretaris di Consejo di Minister, na unda e a experencia di cerca e proceso di decision politico.

Banda di su trabou, Zulema a contribui na empoderacion di hobennan door di ta docente part-time di Organization, Governance and Management na Universidad di Aruba. Desde 2021 Zulema ta Segunda Secretaria-General den e directiva di Comité Olimpico Arubano. Recientemente e a forma parti di e Comision Bishita Real instala door di Minister-President riba solicitud di Gobernador di Aruba.

Zulema ta casa desde 2004 cu Melvin Dabian y ta mama di un yiu muhe (20) studiando na Hulanda y un yiu homber (16) cu tin ambicion pa bira un Student-Athlete den Atletismo.

Un palabra di gratitud na sra. Zulema Erasmus pa acepta e reto y ta convenci cu e lo sa di representa nos Pais dignamente na Washington.



Nos patrimonio cultural ta keda un prioridad

MINISTER DI CULTURA A REUNI CU

MONUMENTENBUREAU RIBA DIFERENTE

PROYECTO CU TA DEN EHECUCION



Recientemente, Minister di Cultura, Xiomara Maduro, a reuni cu Monumentenbureau riba e diferente trabounan di restauracion y mantencion cu ta wordo haci actualmente riba e monumentonan di nos Pais. E mandatario a haya un 'update' riba trabounan cu ta wordo haci riba Maria Convent cu lo bira e facultad di SISSTEM di Universidad di Aruba y ta premira pa e proyecto keda cla na 2024. E edificio di Sociale Zaken banda di Lagoon cu lo conoce algun reparacion di e dak, y e edificio di ex DOW tambe ta wordo prepara pa wordo renova. Otro trabounan di mantencion cu tambe a keda cla ta na Ecury Complex y DVG.

Minister Maduro ta contento di mira e esfuersonan pa cu restauracion y conservacion di nos monumentonan. Cada monumentonan ta forma parti importante di nos patrimonio cultural ta percursa pa conta e storia di nos Pais, awor y pa e generacion cu ta sigui nos.

**NOS ACTITUD POSITIVO
TA NOS FORSA PA SOLUCIONA
CADA RETO Y CREA
OPORTUNIDADNAN NOBO.**





MINISTER MADURO A HAYA UN ACTUALISACION DI STICHTING MONUMENTENFONDS ARUBA RIBA DIFERENTE DESAROYO RELACIONA CU MONUMENTO

**Oportunidadnan nobo di financiamiento ta trece oportunidadnan
nobo pa restauracion**

Riba diahuebs, cual ta e dia cu Minister Maduro ta reserva pa reuni riba Cultura, e mandatario a reuni cu Stichting Monumentenfonds Aruba (SMFA) riba desaroyonan den e mundo di monumento.

Den e encuentro cu e directora di SMFA, sra. Anne Witsenburg, a elabora riba oportunidadnan nobo pa financiamiento cual lo trece oportunidad pa restauracion di monumentonan priva. Tambe a toca riba webinar di 30 mei organisa pa e Dutch Caribbean Heritage Platform unda cu tin oportunidad pa den colaboracion y combersacion cu e otro pais den Reino Hulandes por papia riba e diferente retonan cu e mundo di monumento y su respectivo restauracion ta enfrentando. Na fin di e reunion, Sra. Witsenburg a entrega e relato anual di 2021 na e Minister di Cultura.

Minister Maduro ta satisfecho cu e desaroyonan cu tin y ta spera di wak mas oportunidad sali for di e desaroyonan aki cual ta beneficioso pa e preservacion di e monumentonan di nos Pais.





FELIZ DIA INTERNACIONAL DI ENFERMERIA

Dia 12 di mei ta dia internacional di enfermeria, un dia pa reflexiona y bisa danki na nos enfermero/a nan. E dia aki ta basa riba e fecha di nacimiento di e fundado di enfermeria moderno, esta Florence Nightingale. E aña aki e tema di World Health Organization (WHO) pa cu e dia special aki ta, "Our Nurses Our Future".

Minister di Turismo y Salud Publico sr. Dangui Oduber ta expresa su aprecio pa tur cu ta traha den enfermeria. Nan labor ta bisto entre otro den Hospital, Imsan, centronan di cuido di nos grandinan, den ambulance, oficina di dokternan di cas y specialistanan, Wit Gele Kruis y laboratorionan. Trabou di un enfermero/a no ta facil. Pa nos pashentnan e enfermeranan ta esnan cu ta percura pa nan come, bebe y tuma nan medicamentonan na tempo. Boso empeño y dedicashon ta di suma importancia pa determina e calidad di cuido cu nos pashentnan ta ricibi.

Minister Oduber semper lo ta gradicido pa e cooperacion cu e la ricibi di tur esnan cu ta traha den cuido, e pandemia a bin cu un crisis inespera pero hunto nos a sali di esaki. E gobierno aki lo sigui zorg pa semper tin suficiente profesionalnan disponibel den e funcion importante aki. Minister Oduber su vision ta pa sigui mehora e calidad di cuido aki na Aruba aun mas.

Minister Oduber ta manda palabranan di pabien na tur nos enfermero/a nan y yama nan danki pa dedica nan bida na yuda



oteronan y tambe danki pa comparti nan compasion, expertisio y confiansa. Nos enfermero/a nan ta e weso di lomba den Salud Publico.

Un gradicimiento di curason pa tur boso excelente trabounan cu boso ta haci pa nos comunidad. Un trabou noble cu boso ta haci cu curason grandi.

Como Minister di Salud Publico nos tin gran aprecio pa boso profesion. Masha danki!



E DECISION PA CERA JOHN WESLEY COLLEGE NO TA DI MINISTER ENDY CROES, SINO DI SPCOA

Durante Conferencia di Prensa di 8 di mei 2023, Minister Endy Croes a elabora riba e caso di scol secundario John Wesley College na San Nicolas y a indica cu John Wesley ta resorta bou di Stichting Protestants Christelijk Onderwijs Aruba (SPCOA). Pues, E e decision pa cera John Wesley College no tabata di Minister Endy Croes, sino di SPCOA. E mandatario di Enseñansa a ricibi un carta di parti SPCOA, unda nan ta informa di e situacion di e scol. SPCOA a haci un peticion na Minister di Enseñansa pa warda un rato pa nan maneha e caso internamente.

Minister Endy Croes a señala cu segun e tabel cu SPCOA a presenta, na aña 2018 y 2019 ainda e scol tabata conta cu 225 alumno, cual un scol por maneha di acuerdo ley. Lamentablemente, e aña aki e cantidad di alumno a baha te na 64 alumno. SPCOA a avisa cu nan no por maneha John Wesley College cu 64 alumno. E ta un perdida di placa y e operacion no por want'e. Ademá, segun e tabel por observa cu mayoria di alumnonan cu ta termina scol basico Graf von Zinnendorf, no ta bay John Wesley College despues. SPCOA a yega na e conclusion cu ta miho pa cera e scol.

Pues, ta un decision cu Minister di Enseñansa Endy Croes no ta forma parti di dje. Tambe, nan a informa cu a parti e 64 alumnonan entre Abraham de Veer y Filomena College y a percura pa tur docente haya un trabou, pues ningun docente a keda sin trabou.





Ultimo dia di e prome Caribbean Climate & Energy Conference (CCEC) HUNTO MESTER TUMA PASONAN CHIKITO PERO CONCRETO PA LOGRA COSNAN GRANDI

Diabierna mainta, Minister di Labor, Energia y Integracion, Glenbert Croes, tawata e prome orador pa duna apertura na e ultimo dia di e prome Caribbean Climate & Energy Conference (CCEC) na Aruba. Minister Croes a menciona e palabranan famoso di Neil Armstrong, "That's one small step for man, one giant leap for mankind" y a encurasha tur presente pa hunto tuma e pasonan grandi pa un meta comun y un miho mundo. Cu e palabranan conoci 'Actions speak louder than words' Minister Croes a clausura su discurso expresando cu hunto mester traha pa haci e diferencia pa logra yega e meta pa soluciona retonan den cambio di clima y transiciona pa energia husto.

Director di WEB, señor Alfredo Koolman, den su presentacion a duna informacionnan concreto di e vision y mision di WEB Aruba riba e temanan cu a wordo discuti den e conferencia y den e diferente seccionnan cu tawata tin riba e 3 puntonan: Transicion di Energia Husto, Creando Ecosistemanan Resiliente Climatico, Financiamiento di Accion Climatico.

Oradornan internacional cu a duna presentacionnan tawata: Andrew Tharp, Director of Business Development, pa Eagle LNG, Taco de Vries, experto di eMobility & Sustainable Energy Transition, di Windpark, Patrick Cnubben, Hydrogen Architect di Hydrogen Valley. Tur tres orador a splica ampliamente nan trabounan den e region di Caribe y e importancia pa transiciona pa energia renoba y limpi y e beneficianan cu lo tin pa Aruba y tur isla chikito den nos region.

Tur e oradornan di diahuebs mainta, a expresa cu mester cuminsa chikito pa despues sigui crece. Pero tambe ta importante pa islanan chikito traha hunto pa asina hunto logra mas. Hunto, como islanan chikito, mester tuma pasonan chikito pero concreto, pa logra cosnan grandi.

Na final di e conferencia, Prome Minister Evelyn Wever-Croes y Minister di Hulanda Rob Jetten a duna un conferencia di prensa en conhunto na unda cu nan a gradici tur esnan presente y esnan cu a haci e conferencia posibel y exitoso.



MINISTER THIJSSEN A REUNI CU PROME MINISTER MR. EVELYN WEVER-CROES



Minister Plenipotenciario mr. Ady Thijsen a reuni na Aruba cu Prome Minister mr. Evelyn Wever-Croes. Na e ocasion aki Minister Thijsen a duna e Prome Minister un relato riba su vision pa Arubahuis y Aruba na Hulanda y kico su maneho ta encera, desde cu ela keda nombra como Minister Plenipotenciario na Hulanda y alabes Representante di Aruba na Union Europeo.

E mandatario a bisa cu e kier fortifica e lasonan tanto na Den Haag, como na e municipionan, provincianan, instituto importante pa Aruba manera Raad van State, cerca Hogescholen y Universidadnan. Tambe estrecha e relacion cu embahadanan na Hulanda cu por conduci na formanan di cooperacion cu ta na beneficio di Aruba. Minister Thijsen a haci entrega di un documentacion cu ta ilustra tur e contactonan cu e tabata tin den e delaster lunanan y riba cual tereno a papia pa yega na cooperacion. Sr. Thijsen a bisa Prome Minister Wever-Croes cu tur e trabao aki ta danki na e cooperacion y sosten di e personal di Arubahuis. Pa es motibo aki e mandatario a bisa

cu pa Arubahuis por sigi haci e tremendo trabao aki lo mester di mas inversion tanto material como inmaterial den e instituto Arubahuis.

Prome Minister Evelyn Wever-Croes a gradici Minister Thijsen pa e update di su trabao y cu tur loke te ainda ela realisa na contactonan y terenonan cu por conduci na formanan di cooperacion den future. Tambe premier Wever-Croes a bisa di ta apoya Minister Thijsen den su vision y maneho pa haci Arubahuis y Aruba mas visibel na Hulanda, Europa y Internacional.





DIRECTIE
INFRASTRUCTUUR
EN PLANNING



NOS TA DEN PROCESO:

1

Pa traha riba
mas peticion

2

Pa tuma decision
mas lihe

3

Pa reduci
tardansa

4

Pa duna contesta
mas lihe



Positivismo ta un factor importante pa logra union. Ora cu famianan y comunidadnan ta traha hunto pa metanan comun, e chens pa exito ta bira mas grandi. Tambe e ta crea un ambiente mas stabiel y harmonioso cu ta necesario pa e crecimiento y desaroyo di un sociedad.